

## FERIEN 2016

Das Jahr isch es scho fascht ä Pflicht  
dass ich am Schluss mach äs Gedicht  
es wird langsam schwierig, han doch scho alles gseit  
und du bisch au scho i jedes Fettnäpfli gheit

Über was chönt ich dänn das Jahr na schriebe  
s'Hotel isch ja au immer na s'gliche  
s' Ässe isch guet und d'Terrasse lässig  
Nur d'Zueteilig vom WC Papier isch eher mässig

Nach längerem Sueche hani zuefällig erfahre  
Wo s'Hotel die wertvolle Rolle tuet ufbewahre  
Und zwar hani gseh wo zwei vo eusne Fraue  
still und heimlich sind go WC Papier chlaue

I dem Hotel git's na vill spezielli Sache  
Da hämmer scho öfter chöne drüber lache  
Steckdose a de Decki oder än Chüelschrank ohni Strom  
Duschi ohni Ablauf oder än Fernseh ohni Ton

Öpis dörfed ihr au na wüsse  
Nämli dass i min Duschvorhang vermisse  
Mir sind eus vor 4 Jahr furchtbar näch cho  
Und das Vergnüege händs mer das Jahr gnoh

Wänn am Morge wotsch d'Sunne gseh schyne  
drum am Vorhang ziesch - gheit er grad ab de Schiene  
Toilettetüre schlüssed au immer na von allei  
Ja, s' isch einiges spannender als dihei

Eigentlich chönt i na vill Müschterli verzelle  
Doch hani ja vo eu zwei rede welle  
Danke säge wämmer - dir und am Schatz Nummer eis  
Wäge eu git's so vill Wiederholer uf dere Reis

Das Jahr hämmer nid nur volle Sunneschy  
Das Jahr hämmer NA MEH Tänzerinne deby  
soo vill Lüt mitznäh brucht schona Muet  
doch ihr zwei mached das wüerkli guet

Du zeigsch 3 Tänz am Tag, am Abig namal d'Schritt  
Und au bi de Dance Night machsch wieder mit  
Au als Fremdefüererin häsch di gmacht beliebt  
Mer merkt dass du das emal häsch schtudiert ☺☺ !!!!

Bi de Lektione konzentriersch di voll - trotz dere Hitz  
und zwüscheddure machsch au na dini Witz  
zwar tuesch a paar Counts öpe unterschlah  
aber die holed mer ja spätestens bim repetiere na

Aber nei, , du häsch keini Schritt vergässe  
Du tuesch si halt eifach öpe ässe  
Es git übrigens EIN Schritt und dä git's nienedwo  
Dä lärned nur mir, und dä heisst "oder so"

Dä bruchsch wänn di chersch und es nid chasch fasse  
Dass eusi Schritt nimm zu dini Wort tüend passe  
Dänn git's än Restart oder chli chrose usem Mikrophon  
Und scho sind Wort und Schritt wieder synchron

Es vierteli Drähig isch au so ne verflixti Sach  
Will das Vierteli useme „two wall“ ein „four wall“ macht  
Eigentli isch so nes Vierteli Drähig scho no wichtig  
Drum häsch entschiede mir mached dä Tanz jetzt no richtig

Ganz wichtig isch au de Schatz wo dich understützt  
wo lueged das s'Mikrophon perfekt sitzt  
wo ume rännt wänn öpis muesch ha  
und wo eifach im Hindergrund isch da

Es isch ja scho es bitzli Stress  
Bis alli chönd de „Sadies Dress“  
„Anywhere for you“ isch na rächt happig gsy  
Eifacher dafür „Mountain to the sea“

„Butterflies and Kisses“ - en Tanz wo Villne gfallt  
„Love is like“ isch ein wo mir rächt schnäll händ gschnallt  
„Sofia“ und „Good bye California“ hämmer au na gha  
au mit de Beginners häsch schöni Tänz dure gna

Dass i dim Chopf Endi Wuche es Tanz-Gnusch beschaht  
Isch öpis wo glaub Jedi verschaht  
„Anybody ever told you“ isch nüm so klar überecho  
dass es de letscht isch gsy simmer drum grad echli froh

s'gahnt Endi Wuche eifach länger bis d'Füess wüessed wie laufe  
isch wüerkli schad, chammer d'Konzentration nid i de Migros chaufe  
mir gönd mit sehr villne Stepsheets hei  
und chönd jetzt ächli üebe so ganz allei

Jetzt isch die Wuche scho wieder verbi  
Und wie immer isches eifach super gsy  
Mir händ chöne bade, händ chöne an Strand  
Händ chöne tanze und lache mitenand

Und na öpis hätt glaubs nid nur mir gfalle  
Es hätt na Mehreri s'Shopping Fieber überfalle  
Ständig bisch amene Grüppli über de Weg glaufe  
I jedem Lädeli häsch wieder eini gseh iichaufe

und Zabig hämmer chöne die neue Chleidli beschtune  
ja so shoppe git halt schona gueti Lune  
au wänns heiss gsy isch und s'Wätter ächli „schwul“  
zum shoppe simmer dänn ganz sälte z'fuul

So vo Herze poschte macht villi Fraue froh  
De Umsatz in Primorsko hätt die Wuche sicher zue gnoh  
S' Gwicht vom Koffer bestimmt au  
Aber das passiert halt schnäll mal binere Frau

Morn müemer früe ufschtah d'Ferie sind verby  
Ich bin sicher s'nächst Jahr sind vill wieder derby  
Ich weiss du freusch dich wänn mir wieder cho chönd  
Aber jetzt bisch ganz glücklich dass mir wieder gönd

En riesige Dank de Esther und Dir  
Als chlini Anerkännig hämmer da äs bitzli Papier  
Mit däm chönd er mal öpis bsunders mache  
Theater, Usflug oder söttigi Sache

Nachdem du ja zelle glehrt häsch i dem Jahr  
hoffed mer Morn sind dänn alli im Car  
Ursi - au wänn din taxi Chauffeur lang hätt vo dim Trinkgäld zehrt  
mit eus zäme reise wär doch morn nid so verchehrt

Zyt lauft so schnäll es wird nid lang gah  
Und s'Jahr isch verby und mir sind wieder da  
Einigi werdet sich zwüscheddure öpe mal gseh  
Drum tuet nid de Abschied, sondern nur s'früe ufstah, weh !